

18.10.2022

UKA2022/85

Paneeraq Olsen, Naleraq

Innuttaasut peqqinnissaqarfillu akunnerminni tatigeqatigiinnerat ataqeqatigiinnerallu annertusarnissaa anguniarlugu atorfillit atuisullu oqaloqatigiinnerat annertusarnissaa anguniarlugu peqqinnissaqarfinni immikkoortortaqarfinnilu tamani atuisut siunnersuisooqatigiivnik pilersitsinissamut periarfissat misissornissai pillugit Naalackersuisut peqquneqarnissaanik Inatsisartut aalajangiiffisassaattut siunnersuut. Misissuineq aningaasatigut kingunissaanik nassuiaassaaq UKA2023-lu nallertinnagu tunioraanneqassalluni.

(Inatsisartunut Ilaasortaq Anna Wangenheim, Demokraatit)

Siullermeerneqarnera:

Naleqqaminngaannit siunnersuuteqartoq Inatsisartunut Ilaasortaq Anna Wangenheim, Demokraatit siunnersuutaanut qutsavigaarput.

Ullumikkut peqqinnissaqarfiup ingerlanneqarneranut 1,5 mia.kr-it atorneqartarput innuttaasut sine-riassuatsinni isorartoqisumi sullinneqarlutik. Peqqinnissaqarfimmili sulisut ullut tamaasa angummanniarlutik ilungersorlutik sulisut oqariartuutigineqartuarput sulisullumi tamarmik nakorsaniit peqqissaasunut igaffimmiunut asaasunut il.il. illoqarfimmi nunaqarfimmilu sulisut nersugassapput. Taamaattoq nakorsat oqariartuutigaat qinikkanik tusaaneqaratik aammalu peqqissaasunik amigaa-teqarnerujussuaq piulluni.

Naalackersuisut akissutiminni allapput naammagittaalliornissamut suut periarfissaanersut qanorlu innuttaasut akuutinnissaannut suliniuteqartoqartoq. Qularutissaanngilaq innuttaasut pitsaanerpaamik sullinniarneqartut.

Taamaattoq facebook-ikkut aviisitigut innuttaasuniillu tusartuarterparput sullinneqarneq qanoq ilungersunartiginersoq. Nakorsiarliarluni qanoq ajornartiginersoq; inniminniiniarneq qanoq pisariutiginersoq, nunagisaminngaannit sianeraanni illoqarfimmut allamut nuunneqarluni tassanngaaniillu oqarfigineqarluni uunga sianerlutik inniminniissaatit, aamma allaqqaataaniit sianerluni. Nappassuarmik

eqqorneqarsimalluni katsorsartikkaanni tamatumalu kingunerisaanik najugarisaq qimallugu misisortikkiartorniaaraanni ilaannut qaammatit pingasut sivilunerusumilluunniit utaqqisinneqartarneq namminerlu ujartuinngikkaanni ilaatigut nappaataata siaruaneranik kinguneqarsinnaasoq tusarlugit annernanngitsuunngilaq. Meeqqat amerlunnertik pillugu facebook-i aqqutigalugu qanigisaasut ikiuuttullu Danmark-imut katsorsartinnissaanut katersuunneqartut imminnerminni takkutitsipput peqqinnissaqarfiup innuttaasullu akornanni paaseqartigiiffiullunilu naapeqatigiiffiusinnaasumik ataqatigiissaakkamik arlaatigut amigaateqartugut.

Qanga Naalagaaffiup peqqinnissaqarfik tigummigallaramiuk nakorsaq nammineq angallateqarpoq illoqarfimmit nunaqarfimmut angallatigisartakkaminik aammalu sakiilluut (tuberkulose) atuunnerrata kingunerisaanik angallat misissuut sineriak tamaat angalallugu innuttaasunik tamanik qinnguartaalluni misissuisarpoq. Ullumikkut innuttaasut angalatinneqartarput nunaqarfimmiippata illoqarfigisaminnut annerusumillu katsorsartissappata Dronning Ingrid-ip Napparsimavissuanukartinneqartarlutik. Amerlasuullu nunaqarfigisaminninngaannit namminneq umiatsiaarartik atorlugu nakorsiartariaqartarlutik. Aamma taamaappoq nunaqarfimmit kigutip nakorsaanukarniaaraanni. Innuttaasup nammineq aqqutissani isumagalugu unnuinissat allallu akilerlugit kigutit nakorsaanukartarpoq.

Ullumikkut nakorsat silaannakkut peqqissaasullu angalatinneqartarlutik assigiinngitsutigut pilaasussat illoqarfinnut tikisinneqartarput aammalu nunqarfinnut nakorsiartortitsiartortarlutik. Tamanna imminnermini pitsaagaluartoq qanga periutsit ilinniarfigalugit nutaamik eqqarsartariaqalinnginerpugut assersuutigalugu ”napparsimavimmik angalasumik” pilersitsinissaq. Nunaqarfimmiunik tusartuarparput nakorsanik kigutillu nakorsaanik tikiinneqartarneq akuttuallaartoq. Aammalu pingaartumik illoqarfiit angisuut avataanni nakorsassaaleqineq piummat aqqissuussaaneq allaanerusoq tikinniartariaqarparput. Nunatta isorartunerusujussua eqqarsaatigalugu ”napparsimavik angalasoq” tassaasinnaapput nakorsat assigiinngitsut kigutit nakorsaat ilanngullugu peqqissaasut il.il. sinerussamut aqqissuussaasumik angalatinneqartut.

Naleqqaminngaaniit siunnersuuteqartoq Inatsisartunut Ilaasortaq Anna Wangenheim, Demokraatit siunnersuutaa taperserparput ataatsimiititaliamullu ingerlateqqinnissaa kissaatigalugu.